

**PIALA SULTAN JOHOR**

# Skuad hoki remaja langkah kiri

BERITA HARIAN

23/10/2017 p. 84

**Johor Bahru:** Skuad hoki remaja negara tewas 0-1 kepada Great Britain pada Kejohanan Hoki Bawah 21 Tahun, Piala Sultan Johor di Stadium Hoki Taman Daya, di sini, malam tadi.

Dalam aksi pembukaan itu, pintu gol skuad remaja negara cemas seawal minit kedua selepas Great Britain meraih dua pukulan sudut penalti namun benteng anak didik Wallace Tan masih mampu bertahan.

Percubaan terbaik Malaysia hadir pada minit ketujuh apabila Norsyafiq Sumantri melakukan pukulan kilas, namun bola sedikit tersasar dari gawang ketika Chris Wyver sudah pun tertewas.

Ketika tempoh aksi suku pertama berakhir, Great Britain yang dibimbing Jon Bleby gagal menggunakan kesempatan mencipta jaringan selepas meraih tiga pukulan sudut penalti berturut-turut.

Hasrat Malaysia untuk membuka tirai jaringan pada aksi suku kedua tidak juga + kesampaian walaupun meraih pukulan sudut penalti pada minit ke-22, apabila bola tolakan Firdaus Omar dihalang Wyver yang sempat merebahkan badan.

## Benteng roboh

Benteng tuan rumah akhirnya roboh pada minit ke-51, selepas Duncan Scott melakukan pukulan kilas sebelum masuk di celah kaki penjaga gol, Adrian Albert untuk kedudukan 1-0. Ia kekal sehingga wisel penamat.

Sementara itu, juara bertahan, Australia berpesta gol membelasah pendatang baharu, Amerika Syarikat 19-0 sekali gus mendominasi tangga teratas kejohanan edisi ketujuh.

Jaringan besar itu adalah rekod jaringan terbanyak yang dihasilkan dalam sejarah saingan Piala Sultan Johor sejak diperkenalkan pada 2011.

Dalam satu lagi aksi juara dunia, India bergelut meraih kemenangan selepas bangkit daripada ketinggalan dua gol untuk menewaskan Jepun 3-2 yang tampil dengan corak permainan konsisten sebelum tewas.

**Oleh Rizar Mohd Noor**

[FOTO MOHD AZREN JAMALUDDIN/BH]



**Pemain Malaysia, Aiman Nik Rosemi (kanan) diasak pemain Great Britain, Jack Waller, malam tadi.**